

萬有文庫

第二集七百七種

王雲五主編

大方廣佛華嚴經

(九)

實叉難陀譯
澄觀撰述

商務印書館發行

大方廣佛華嚴經

(九)

實叉難陀
譯
澄觀
撰述

國學基本叢書

大方廣佛華嚴經疏鈔會本卷二十三

華藏世界品第五

疏初來意者。前品通明諸佛刹海。今此別明本師所嚴依果。答世界海問。故次來也。

疏釋名者。準梵本具云華藏莊嚴嚴具世界海之徧清淨功德海。光明品譯者嫌繁。乃成太略。處中應云蓮華藏莊嚴世界海品。謂蓮華含子之處。目之曰藏。今刹種及刹。爲大蓮華之所含藏。故云華藏。其中一一境界。皆有刹海塵數清淨功德。故曰莊嚴。世界深廣。故名爲海。有云世界依海。故立海名者。恐非文意。以下云華藏莊嚴世界海。住在華中。故其梵云嚴具。卽是能嚴。其徧清淨功德海。光明卽顯嚴之相用。依體有用。故致之言。今文舉體攝用。但云華藏。鈔梵本具云者。梵云拘蘇磨華多羅藏。瞿訶莊嚴。阿楞伽嚴具。嚧迦駄都世界。三牟達囉海。鉢履輸陀云徧清淨懼曩功德。三牟達囉海。阿囉婆娑光明。鉢履勿多品。此云華藏莊嚴嚴具世界海徧清淨功德海。光明品。

疏約事可爾。何因刹海相狀如斯。略舉二因。一約衆生如來藏識。卽是香海。亦法性海。依無住本。是謂風輪。亦妄想風。於此海中有因果相。恒沙性德。卽是正因之華。世出世間未來果法。皆悉含攝。故名爲藏。若以法性爲海。心卽是華。含藏亦爾。然此藏識相分之中。半爲外器。不執受故。半爲內身。執爲自性。生覺受故。如來藏識何緣如此。法如是故。行業引故。二約諸佛。謂以大願風持大悲海。生無邊行華。含藏二利染淨果法。重疊無礙。故所感刹相狀如之。是以出現品中。多將世界以喻佛德。細尋文意。乃由

佛德世界如之。鈔約事可爾下。覈其本源。不爲此釋。豈委刹海之興由。

疏三宗趣者。別顯本師依報。具三世間融攝無盡爲宗。令諸菩薩發生信解成就行願爲趣。除如前品。但總別異耳。融攝之相。亦見前文。賢首立華藏觀。復有十德。大同小異。如彼文說。鈔言有十德者。前品已引。

爾時普賢菩薩復告大衆言。諸佛子。此華藏莊嚴世界海。是毘盧遮那如來往昔於世界海微塵數劫修菩薩行時。一一劫中。親近世界海微塵數佛。一一佛所。淨修世界海微塵數大願之所嚴淨。

疏第四釋文。一品分三。初明華藏因果自體。二明藏海安布莊嚴。三明所持刹網差別。三段如次。釋華藏莊嚴世界之名。今初二。先長行。後偈頌。長行亦二。初舉果。屬人顯因。深廣二彰。果體相辯其寬容。今初也。謂指此刹海。是我本師修因所淨。然因深廣有三勝相。一長時修。刹海塵劫故。不唯三祇。二於多劫。一一遇多勝緣。不唯勝觀釋迦等佛。三於多勝緣。一一淨多大願。願淨國等。不唯淨一無生等。由上三重。故云深廣。鈔初華藏等者。然第二安布莊嚴。亦是果相。故應對果分因。總爲二段。謂先明刹因。後彰果相。以第一段長行。具有因果。偈文雙頌因果。故合於因。屬自體中。不唯勝觀等者。俱舍論第十八說。於三無數劫。各供養七萬。又如次供養五六七千佛。三無數劫滿。逆次逢勝觀。然燈寶髻佛。初釋迦牟尼。釋曰。此二偈中。初偈明供養佛數。謂初無數劫。供養七萬五千佛。第二無數劫。供養七萬六千佛。第三無數劫。供養七萬七千佛。後頌明逢何佛供養。言逆次者。從第三無數劫向前。以明。謂第三無數劫滿。逢勝觀佛。第二無數劫滿。逢然燈佛。第一無數劫滿。逢寶髻佛。最初發心。逢釋迦佛。發誓願。

言願我當作佛一如今世尊彼佛世尊末劫出世法住千年今我如來一一同彼故今疏云不唯勝觀者舉第三阿僧祇劫滿佛言釋迦者舉初發心之佛而言等者乃有三義一等然燈寶髻二等所供佛數三等餘教所明設言供養三十六恒三十八恒佛等皆未足爲多也不唯淨一無生忍者如智論說五華供養然燈得無生法忍故金剛經云若有少法可得然燈佛則不與我授記等無法可得是無生相而言等者等餘法門俱舍頌云但由悲普施被析心無忿讚歎底沙佛次無上菩提六波羅密多於如是四位一二又一二如次修圓滿釋曰初之四句卽是四位初位一滿謂普施成檀次位二滿謂尸及忍被析不報故能滿尸由內無忿故成於忍第三位中但一度滿謂精進度第四位中定慧雙滿故云一二又一二等言底沙者此云圓滿讚佛偈云天地此界多聞室逝宮天處十方無丈夫牛王大沙門尋地山林徧無等七日七夜忘下一足歎底沙故超於彌勒九劫先成佛智論之中亦同此說故六度滿前後不多今經一一佛所淨修世界海微塵數大願況於多佛況多劫耶故疏結云由上三重故云廣深

疏然瑜伽起信等約三乘教一方化儀一類世界定說三祇今約一乘該通十方及樹形等界故云刹海塵數是以寶雲經言我爲淺識衆生說三僧祇劫修行然我實經無量阿僧祇劫修行又時無別體依法上立法旣無盡時亦無窮況念劫圓融不應剋執鈔然瑜伽下二隨難別釋卽重釋三祇約三乘一乘以通言該通十方者對上一方化儀及樹形者對上一類世界且如娑婆一劫方知安樂得爲一日則安養世界乃經三無數日耳更方袈裟幢刹未經歲月況於後後以劫爲日之刹耶是則不可

以此一方類。定於成佛時劫之數。二異類刹者。卽於一界。卽具諸界。互不相見。時劫亦殊。安知修短。故朝菌不知晦朔。況識春秋。況於大椿之歲耶。寶雲經者。經云。善男子。菩薩不能思議。如來境界。如來境界。不可思議。但爲淺近衆生。說三僧祇修得菩提。而實發心以來。不可計數。賢首釋云。不可計者。不可計數阿僧祇也。義分齊云。始教三祇。不同小乘。小乘十十數之。此卽倍倍數之。仍說百劫修相好等。智度論破此。別修相好。不許三祇之外別修。卽是實教之意。然實教之意。自有二義。一定三僧祇。一方化儀故。又是實佛故。起信論云。或示超地。速成正覺。以爲怯弱衆生故。或說我於無量阿僧祇劫。當成佛道。以爲懈慢衆生故。能示如是無量方便。不可思議。而實菩薩種性根等。發心則等。所證亦等。無有超過之法。以一切菩薩。皆經於三阿僧祇劫故。斯則定也。二者不定。復有二意。一爲通餘類世界故。如勝天王說。卽前樹形等刹。是二據佛實德無限故。如寶雲經。若瑜伽說。有二種無數劫。一者日夜月半月等。方便顯時無量故。二者如常說。若依初義。經無量劫。若依後義。但三僧祇。然依此釋。不同寶雲。寶雲不言爲淺近衆生。說於大劫。爲於深勝說。日月劫。明知意殊。是則瑜伽亦是一方所宜說耳。又時無別體下。別教一乘融攝。以說如毘目仙人執善財手。時經多劫。處歷無邊。故不可以長短思也。若顯超勝。一生頓圓。若約甚深。多劫莫究。故云不可定執。貴在入玄。

○疏第二諸佛子下。彰果體相者。植因旣深。果必繁奧。然所依刹量。諸教不同。小乘但一娑婆。三乘有大小之化。或色究竟爲實。或他方別有淨邦。今一乘十佛之境。大小無礙。淨穢相融。且依一相。說有邊表。實則一重橫尋無邊。況復重重塵含法界。鈔然所依下。二彰其分量。言大小之化者。如梵網經周而

千華上。復現千釋迦。卽大化也。一華百億國。一國一釋迦。卽小化也。小化唯一四洲。大化總該百億。且依一相者。且依一種義相。不壞邊表。有蓮華外別佛刹海等。實則稱性。橫不可尋。故云法界無差別。若以性融相。則一塵中。法界無盡。

疏然準下別顯。應有十事。一所依風輪。二風持香海。三海出蓮華。四華持刹海。五繞臺輪山。六臺面寶地。七地有香海。八海間香河。九河間樹等。十總結多嚴。今文之中。唯闕一河。文且分四。第一能持風輪。第二所持香海。第三海出蓮華。第四華持刹海。鈔應有十事者。以文廣釋十事故。此中長行。略標列故。是以古德一品之中。先分土因。就果相中。卽分十段。今不依者。以下六事。各有長行。偈頌。而前四事。同一長行。故科十段。於文不便。先科爲三。於第一華藏自體長行之內。方分爲四耳。疏然其利因。有其總別。已見上文。爲顯別義。且明一因成於一果。鈔已見上文者。卽起具因緣中。通義易知。故示別相。

諸佛子。此華藏莊嚴世界海。有須彌山微塵數風輪所持。

疏今初風輪之因。卽大願等。亦如前釋。於中文三。初總標數。二略列名。三別舉最上。其最下風輪。名平等住。能持其上一切寶燄熾然莊嚴。次上風輪。名出生種種寶莊嚴。能持其上淨光照耀。摩尼王幢。次上風輪。名寶威德。能持其上一切寶鈴。次上風輪。名平等燄。能持其上日光明相。摩尼王輪。次上風輪。名種種普莊嚴。能持其上一光明輪華。次上風輪。名普清淨。能持其上一切華燄師子座。次上風輪。名聲徧十方。能持其上一切珠王幢。次上風輪。名一切寶光明。能持其上一切摩尼王樹華。次上風

輪名速疾普持。能持其上一切香摩尼須彌雲。次上風輪。名種種宮殿遊行。能持其上一切寶色香臺雲。疏列中名平等住者。一徧持諸位故。二稱實性故。餘名可知。風並在下。寶在臺面。以力遙持。鈔以力遙持者。古有二釋。一云。一重風輪。持一重物。疏以出現品中有十風輪。持欲色等。皆是遙持。故今案定。諸佛子。彼須彌山微塵數風輪。最在上者。名殊勝威光藏。

疏三舉最上者。勝力能持香海。故立其名。

能持普光摩尼莊嚴香水海。

疏第二能持下。所持香海。以摩尼發光。普照一切嚴海底岸。及寶色香水。故立此名。又藏識名海。具德深廣故。流注名水。剎那性故。又佛性名水。遠熏名香。聞未證故。涅槃亦云。有人聞香。鈔又佛性名水下。約通生佛。佛性卽是真法性故。故此品初海表三義。今舉其二。略不說悲涅槃亦云。有人聞香。卽第七經。至問明品。當具引之。

此香水海有大蓮華。名種種光明藥香幢。

疏第三此香水下。所出蓮華。藥放異光。又發勝香。高出降伏。故立此名。又所發萬行。一一覺性。故曰光明。皆能普熏。卽香義也。鈔又所發萬行下。上約事釋。此約表法。但通相表行。若別說者。略示十德。表於十度。開敷鮮榮。以表施度。二自性無染。以表戒度。三香氣芬馥。四寶莖堅固。五寶葉扶疎。六寶藥光幢。七相巧成就。八含藏蓮子。九寶臺堅住。十普放光明。下八如次顯於八度。

華藏莊嚴世界海。住在其中。四方均平。清淨堅固。金剛輪山。周匝圍繞。地海衆樹。各有區別。

疏第四華藏下所持刹海四方均平。總顯形相清淨堅固彰其體性。金剛圍等別明所有。卽下別顯此爲其本。一山二地。三海四樹。各別區分。卽總顯多嚴。但闕一河。以下有別顯。故此略明。下亦略頌。

是時普賢菩薩欲重宣其義。承佛神力。觀察十方而說頌言。
世尊往昔於諸有微塵佛所修淨業。故獲種種寶光明。華藏莊嚴世界海。
廣大悲雲徧一切。捨身無量等刹塵。以昔劫海修行力。今此世界無諸垢。

疏第二偈中。然長行偈頌有十例五對。謂有無廣略離合先後爲八九或超間十或頌已重頌。故釋頌文不可一例。上下準之。此文略有四例。一宿因現緣經離頌合。鈔一宿因現緣者。此中名長行爲經。以取長行綴葢略說所應說義。別相修多羅故。言經離者。宿因卽前顯因深廣現緣。卽前風持香海等。此二明離言頌合者。初偈頌總前半宿因。後半現緣。第二偈三句宿因。第四句是現緣故。

疏二所成果相經略頌廣。鈔二所成果相者。長行云華藏世界海住在其中者。卽所成果相。此文則略以十偈之內皆有果相。故云頌廣。

疏三現緣風輪經廣頌略。鈔三現緣風輪者。經列十種風輪。偈中但云風力所持無動搖耳。

疏四山地海樹經有頌無。鈔四山地海樹者。長行云金剛輪山周匝圍繞。地海衆樹各有區別。此經有也。頌無可知。上言有四者。但有四例。唯廣略一種。乃成一對。離合有無。但成一例耳。若成對者。應須經合頌離。經無頌有。方成三對。餘四例二對。此中則無下頌則有。

疏十偈分二。初二頌上因相。卽辯因招果。

放大光明徧住空。風力所持無動搖。佛藏摩尼普嚴飾。如來願力令清淨。普散摩尼妙藏華。以昔願力空中住。

疏餘頌果相。於中分四。初一偈半頌風輪。皆上句所持。下句能持。初半偈以果持果。後偈兼明能成之。因前半離障。願令清淨故。後半無礙。願依空住故。

種種堅固莊嚴海。光雲垂布滿十方。諸摩尼中菩薩雲。普詣十方光熾然。

疏二有一偈頌香海。尋此了名。

光燄成輪妙華飾。法界周流靡不徧。一切寶中放淨光。其光普照衆生海。十方國土皆周徧。咸令出苦向菩提。

寶中佛數等衆生。從其毛孔出化形。梵主帝釋輪王等。一切衆生及諸佛。化現光明等法界。光中演說諸佛名。種種方便示調伏。普應羣心無不盡。

疏三有三頌半。頌蓮華。初一偈半。釋種種光明。顯此華以寶爲體。次一偈。釋香義。就法以明。寶中出佛。佛出世主。如從質發香。遠熏之義。後一釋幢義。演佛是高出義。調生是摧伏羲。

華藏世界所有塵。一一塵中見法界。寶光現佛如雲集。此是如來刹自在。廣大願雲周法界。於一切劫化羣生。普賢智地行悉成。所有莊嚴從此出。

疏四有二頌。明刹自在。總頌上所持刹海。初偈自在。一一稱性故。卽同時具足相應門也。心塵準思。寶光現佛者。依正互融故。後偈結歸普因。故能含攝。

爾時普賢菩薩。復告大衆言。諸佛子。此華藏莊嚴世界海大輪圍山。住日珠王華蓮之上。疏第二別顯安布莊嚴。文分爲六。第一四周輪山。二寶地。三香海。四香河。五樹林。六總結。各別有偈。今初輪山。則清淨戒德內攝外防之所成也。長行中三。初總舉所依。二栴檀下。別顯體相。三如是下。結德無盡。今初山所依處。卽地面四周。日珠王者。所依處地。故舊經云。依蓮華日寶王地住。亦有言大華之上。別有此蓮爲山所依。義似不順。所以地受此名者。前華名種種光明藥。偈中云。光燄成輪。又云。一切寶中放淨光明。知此華以寶爲體。是則如日輪之珠王爲蓮華也。斯卽總華之稱。栴檀摩尼以爲其身。威德寶王以爲其峯。妙香摩尼而作其輪。燄藏金剛所共成立。一切香水流注其間。衆寶爲林。妙華開敷。香草布地。明珠間飾。種種香華。處處盈滿。摩尼爲網。周布垂覆。如是等有世界海微塵數衆妙莊嚴。

疏二別顯中。前取堅利。且云金剛。今明具德。略有十相。前四自體圓滿。後六外相莊嚴。一身爲總形。摩尼圓明。栴檀芬郁。皆戒之德也。二山峯。謂秀出孤絕。威伏諸惡。三山輪。古有二義。一山彎曲之處。二山腹腠出如師子座。半月爲輪。準下偈文。輪居山下。爲山所依。四成山之緣。上舉三事。各別有體。今顯金剛內含光燄。徧成其體。如世土石。雜而成山。金剛徧故。得金輪名。餘六文顯。並在山間。爾時普賢菩薩。欲重宣其義。承佛神力。觀察十方而說頌言。

世界大海無有邊。寶輪清淨種種色。所有莊嚴盡奇妙。此由如來神力起。

疏應頌有十文分爲二。前六明山體相莊嚴。頌前別顯。後四辯山妙用自在。亦顯依正無礙。卽頌前結

文前中五。初一總頌圍山。初句所圍。次二句能圍。後句出因。言無邊者。有其二義。一但總相顯多。故云無邊。實有邊表。二說有圍山外者。是無邊之邊。不礙理。而卽事故。今云無邊者。是邊之無邊。不壞相而卽理故。鈔是無邊之邊者。意明理無分限。總曰無邊。事有分限。故名有邊。若依理成事。理性全隱。則無邊卽邊。若會事歸理。事相全盡。則邊卽無邊。今則不爾。不失理而現事。云無邊之邊。不壞事而理顯。云邊之無邊。此是事理無礙義。不是相卽相作之義。思之。

摩尼寶輪妙香輪。及以真珠燈燄輪。種種妙寶爲嚴飾。清淨輪圍所安住。

疏二有一頌。頌前山輪。

堅固摩尼以爲藏。閻浮檀金作嚴飾。舒光發燄徧十方。內外映徹皆清淨。

疏三一頌山體。

金剛摩尼所集成。復雨摩尼諸妙寶。其寶精奇非一種。放淨光明普嚴麗。

疏四一頌成山之緣。

香水分流無量色。散諸華寶及栴檀。衆蓮競發如衣布。珍草羅生悉芬馥。無量寶樹普莊嚴。開華發藥色熾然。種種名衣在其內。光雲四照常圓滿。

疏五六二偈。頌前水等諸嚴。及加衣等。

無量無邊大菩薩。執蓋焚香充法界。悉發一切妙音聲。普轉如來正法輪。諸摩尼樹寶未成。一一寶未現光明。毘盧遮那清淨身。悉入其中普令見。

諸莊嚴中現佛身。無邊色相無央數。悉往十方無不徧。所化衆生亦無限。一切莊嚴出妙音。演說如來本願輪。十方所有淨刹海。佛自在力咸令徧。

疏後四妙用自在並顯可知。

爾時普賢菩薩復告大衆言。諸佛子。此世界海大輪圍山內所有大地。

疏第二臺面寶地。卽體心性定之所成也。長行文三。初標所在。二一切下。別顯體相莊嚴。三總結。一切皆以金剛所成。堅固莊嚴。不可沮壞。清淨平坦。無有高下。摩尼爲輪。衆寶爲藏。一切衆生種種形狀。諸摩尼寶以爲間錯。散衆寶末布以蓮華。香藏摩尼分置其間。諸莊嚴具充徧如雲。三世一切諸佛國土。所有莊嚴而爲校飾。摩尼妙寶以爲其網。普現如來所有境界。如天帝網。於中布列。諸佛子。此世界海地。有如是等世界海微塵數莊嚴。

疏二十中十句。初一地體。標以金剛。釋以堅固不壞。徧華藏地。盡是金剛。故上菩提場地。徹華藏也。二地相平淨。餘八皆莊嚴。謂三飾以寶輪。四畜以寶藏。五間以異寶。六散以寶末。七布以蓮華。八分置香摩尼。九充以莊嚴具。但云諸嚴嚴有多少。三世佛國之嚴而爲嚴者。顯無盡之嚴具也。十覆以寶網。隱映莊嚴。網有何用。普現佛影。此網何相。如天帝網而布列也。又此帝網。重現無盡。成上普現如來境界。及上。一境界皆無盡也。鈔但云諸嚴下。此句稍長。故牒釋之。卽從諸莊嚴具下。是第九句。摩尼妙寶下。皆第十句。

爾時普賢菩薩欲重宣其義。承佛神力。觀察十方而說偈言。

其地平坦極清淨。安住堅固無能壞。摩尼處處以爲嚴。衆寶於中相間錯。金剛爲地甚可悅。寶輪寶網具莊嚴。蓮華布上皆圓滿。妙衣彌布悉周徧。菩薩天冠寶瓔珞。悉布其地爲嚴好。栴檀摩尼普散中。咸舒離垢妙光明。寶華發燄出妙光。光燄如雲照一切。散此妙華及衆寶。普覆於地爲嚴飾。

疏偈有十頌分二。前七頌前別顯。後三頌總結。前中三。初四頌前八段。而小不次者。顯前無優劣故。或重或廣者。顯義無方也。恐繁不配。可以意得。

密雲興布滿十方。廣大光明無有盡。普至十方一切土。演說如來甘露法。一切佛願摩尼內。普現無邊廣大劫。最勝智者昔所行。於此寶中無不見。疏次二頌嚴具如雲。

其地所有摩尼寶。一切佛刹咸來入。彼諸佛刹一一塵。一切國土亦入中。疏後一偈頌。如天帝網。謂一寶旣收一切。則彼刹諸塵。復攝一切。卽重重也。

妙寶莊嚴華藏界。菩薩遊行徧十方。演說大士諸弘願。此是道場自在力。摩尼妙寶莊嚴地。放淨光明備衆飾。充滿法界等虛空。佛力自然如是現。諸有修治普賢願。入佛境界大智人。能知於此刹海中。如是一切諸神變。

疏後三偈頌總結者。結其所屬。初偈結屬道場。次屬佛力。後結能知之人。

爾時普賢菩薩。復告大衆言。諸佛子。此世界海大地中。有十不可說佛刹微塵數香水海。十字依北藏補。

疏第三地面香海者。上之大海。既是藏識。今明心華之內。攝諸種子。一一種子。不離藏識海。故有多香海。然一一具於性德。故皆有莊嚴。長行分二。初總舉數。準下刹種。及梵本中。皆有十不可說。今闕十字。或是譯人之漏。或是傳寫之失。下標種處亦然。鈔準下刹種者。以中海管十海。十海一道布列。結有不可說佛刹微塵數香水海。十道皆然。一海一種。故有十不可說也。下標種者。標云。諸佛子。此不可說佛刹微塵數香水海中。有不可說佛刹世界種。釋曰。此卽標種處。無十字。亦例合有。一切妙寶莊嚴其底。妙香摩尼莊嚴其岸。毘盧遮那摩尼寶王。以爲其網。香水映徹。具衆寶色。充滿其中。種種寶華。旋布其上。栴檀細末。澄湔其下。演佛言音。放寶光明。無邊菩薩。持種種蓋。現神通力。一切世界。所有莊嚴。悉於中現。

疏二一切下。別顯莊嚴。準後總結。應云。一一香海。各有若干莊嚴。今文略無。若按文取義。一切之言。卽一切海。總以妙寶而爲其底等。文有二十句。前十明海體狀。一底。二岸。三網。四水。五華。六湔。七聲。八光。九人衛現通。十結廣無盡。

十寶階。陸行列分布。十寶欄楯。周而圍繞。四天下微塵數。一切寶莊嚴。芬陀利華。敷榮水中。不可說百千億那由他。數十寶戶。羅幢。恆河沙數。一切寶衣。鈴網幢。恆河沙數。無邊色相。寶華樓閣。百千億那由他。數十寶蓮華城。四天下微塵數。衆寶樹林。寶燄摩尼。以爲其網。恆河沙數。栴檀香。諸佛言音。光燄摩尼。不可說百千億那由他。數衆寶垣牆。悉其圍繞。周徧嚴飾。

疏後十寶下十句。攝異莊嚴。唯白蓮華。當於水中。餘皆在岸。言十寶者。有云。金銀琉璃。硨磲瑪瑙。珊瑚。

琥珀眞珠玫瑰琴瑟爲十十中前七卽是七寶。芬陀利者卽白蓮華。亦是正敷榮時。尸羅幢者應云試羅。此云美玉。若言尸羅。此云清淨。二義俱通。餘並可知。以法門合之。可以意得。鈔芬陀利卽白蓮華者。卽唐三藏等諸師所翻。而言亦是正敷榮時者。卽什公意。故叡公法華序云。華有三時之異。華而未敷。名屈摩羅。彫而將落。名迦摩羅。處中盛時。名芬陀利。生公亦云。器像之妙。莫踰蓮華。蓮華之美。榮在始敷。始敷之盛。則子盈於內。色香味足。謂之芬陀利。意亦同也。今存二譯。各是一義。梵語多含。故兩存耳。

爾時普賢菩薩欲重宣其義。承佛神力。觀察十方而說頌言。

此世界中大地上。有香水海摩尼嚴。清淨妙寶布其底。安住金剛不可壞。香藏摩尼積成岸。日燄珠輪布若雲。蓮華妙寶爲瓔珞。處處莊嚴淨無垢。香水澄淳具衆色。寶華旋布放光明。普震音聲聞遠近。以佛威神演妙法。疏頌中菩薩持蓋。經有頌無。日燄光輪。經無頌有。且分爲二。初三頌初十句。一頌底。二頌岸及網。瓔卽網類。三頌餘七。細尋可見。

階陛莊嚴具衆寶。復以摩尼爲間飾。周迴欄楯悉寶成。蓮華珠網如雲布。摩尼寶樹列成行。華葉敷榮光赫奕。種種樂音恒競奏。佛神通力令如是。種種妙寶芬陀利。敷布莊嚴香水海。香燄光明無暫停。廣大圓滿皆充徧。明珠寶幢恒熾盛。妙衣垂布爲嚴飾。摩尼鈴網演法音。令其聞者趣佛智。

妙寶蓮華作城郭。衆彩摩尼所嚴瑩。眞珠雲影布四隅。如是莊嚴香水海。垣牆繚繞皆周匝。樓閣相望布其上。無量光明恒熾然。種種莊嚴清淨海。毘盧遮那於往昔。種種刹海皆嚴淨。如是廣大無有邊。悉是如來自在力。

疏餘七偈。頌後十句。而小不次。謂一頌階陛欄楯。二頌樹林。三頌華敷。四頌幢相。五頌城珠。六頌牆閣。繚者纏也。七頌結嚴屬佛。一昔因。二現力。

爾時普賢菩薩復告大衆言。諸佛子。一一香水海。各有四天下微塵數香水河。右旋圍繞。

疏第四海間香河。卽隨一一心同時相應功德流注也。長行亦三。初舉數。二一切下。辯嚴。三若廣下。結廣。鈔卽隨一一心者。大海旣喻藏識。小海復表種子。二皆心王故。河表同時心。所謂善十一。徧行別境。二千福河。流注心地。

一切皆以金剛爲岸。淨光摩尼以爲嚴飾。常現諸佛寶色光雲。及諸衆生所有言音。其河所有漩澁之處。一切諸佛所修因行種種形相。皆從中出。摩尼爲網。衆寶鈴鐸。諸世界海所有莊嚴。悉於中現。摩尼寶雲。以覆其上。其雲普現華藏世界。毘盧遮那十方化佛。及一切佛神通之事。復出妙音。稱揚三世佛菩薩名。其香水中。常出一切寶燄光雲。相續不絕。

疏嚴中嚴事。並無差別。故云一切皆以。謂並用寶體寶嚴。聖靈游集。光雲相映。萬象浮輝。十句可知。若廣說者。一一河。各有世界海微塵數莊嚴。

疏三結廣中。旣繞小海之小河。已有刹海塵數之嚴。彌顯諸標結文。非唯約事。皆是一多無礙耳。